



Nuuk, 19. septemberi 2016

UKA 2016/89

Inatsisartut suleriaasiat § 36 immikkoortoq 1 naapertorlugu matumuuna apeqquteqaat aallaavigalugu oqallisissiatut siunnersuut imaattoq saqqummiuppara.

**Meeqqat angerlasimaffiup avataanut inissineqartartut pillugit angajoqqaanut paaseqatigiiffiunerusumik suleqateqarnissamik, ersarinnerusunillu piunasaqaasiortoqartalernissaanik Naalakkersuisut suliniuteqaqqunissaat pillugu apeqquteqaat aallaavigalugu Inatsisartut oqallinnissaannik siunnersuut.**

**Taamaaliornikkut angerlarsimaffiup qimagutsitaaffiusup nakkutigineqarluni, angajoqqaallu qaninnerusumik suleqatigalugit, angajoqqaanik siunnersuineq, katsorsaaneq allanillu angerlarsimaffiup pitsanngoriaateqarfiusumik meeqqanut angalarsimaffimmiit qimagutsitaasimasunut piaarnerusumik angerlartitseqqinnissaq anguneqarsinnaaqqullugu.**

(Inatsisartunut ilaasortaq, Anthon Frederiksen, Partii Naleraq).

### **Tungavilersuut:**

Naluneqanngitsutut meeqqat katillugit 642-ut september 2014 tikillugu angerlarsimaffiup avataanut inissineqarsimasut siorna Naalakkersuisunut apeqquteqarninni paasitineqarpunga. Aamma taamanikkut paasissutissiissutigineqarpoq, meeqqanut angerlarsimaffiup avataanut inissiisarnermi aningaasat ukiumut 235 mio kr missai aningaasartuutigineqartartut.

Tassa naatsumik oqaatigalugu, meeqqat paarinerlunneqarnerat allatulluunniit pissusissamisuunngitsumik iliuuseqarfigineqartarnerannut pisortat, minnerpaamik ukiumut 235 mio kr-it atortarpaat.

Tassanilu miserrattissaanngitsumik qularnanngitsumillu angajoqqaat ilaasa imigassamik, ikiaroorartumik allanilluunniit ajornartorsiuteqarnerat pissutaasoq misissuisarnerpassuartigut takuneqarsinnaavoq.

Taamaattumik piffissanngorpoq, isumaginninnikkut sullissinerup sukateriffigineqarnissaa, minerunngitsumik aamma ulluinnarni inunnik isumaginninnermik sullissisut, suliaminnik naammassinninniartutik angummanniapiloortut, tamanut pitsaasumik naammassisaqarfiulluurtumillu aqqissuussiffigineqarnissaat tamatta sulissutigisariaqarparput.

Angajoqqaatut pisussaaffeqarnek akisussaaffeqarnerlu, angajoqqaarpassuarnik qarsupinneqartartutut ippoq, tamanna immikkut illuinnartumik aamma iliuseqarfigineqartariaqarpoq.

Tassami meerannguit pisuussuteqanngitsut, atugarliortinneqartartullu amerlavallaarujussuarput, tamannalu akuerineqarsinnaanngilaq.

Taamaammat angajoqqaat ilaasa meeqqaminnut pisussaaffeqarnerat aammalu akisussaafferujussuarmik pisortanut tunniussiinnartarnerat akuersaaginnarneqarsinnaanngilaq.

Soorunami angajoqqaarpassuaqarpoq, meeqqaminnik paarsilluartunik isumaginnilluartunillu, taakku aamma tapersersortuartariaqarput nersualarlugillu.

Taamaattumik suliniarnermi uani aamma taakku puujorneqassanngillat, tassami angajoqqaat ilaatigut pissakitsunnguugaluarlutik, meeqqaminnik isumaginnilluartut paarsilluartullu aamma nalilersuinermi ilaatinneqartariaqarput, naak qulequttamut toqqaannartumik attuumassuteqanngikkaluartut.

Taamaattoq meeqeriveqarnek eqqarsaatigissagaanni, angajoqqaarpassuit, pissakitsut akunnattumillu annertussusilinnik isertitaqartartut ilungersungaarlutik angummanniapiloortut aamma eqqaanngitsoorneqarsinnaanngillat.

Ilagutariinni soorunami meeqqap naluneq ajorpaa, napparsimaleruni angajoqqaaminik imaluunniit allatigut ikiortariaqaleruni isumalluuteqarnissani. Taamaammat angajoqqaat meeqqaminnut pisussaaffiat ulluugaluarpat unnuaagaluarpalluunniit eqqaamaneqartuartariaqarpoq.

Taamaattumik tamatta immitsinnut pisussaaffilernissarput eqqaamajuartariaqarparput, tassani susassareqatigiinneq, qanga siulitsinnit pingaartinneqarsimasoq sulilu ilatsinnit pingaartinneqartoq qularnanngilaq, aamma eqqaasitsissutigilaartaraanni ajortuunngitsoq angusaqarfiusinnaavoq.

Meeqqat sapinngisamik اساسaminnik qaninnerpaamik tuniorarneqarlutik nuannernerpaanillu misigitinneqarlutik peroriartornissaat tamatta pingaartinnerusariaqarparput.

Oqallilluarnissarsi qilanaaraarput.